

La Talina vegn renovada

Ils 22 da fevrer organischescha Giuventetgna Cadi ina fiera da plugs en favur dalla renovaziun

(anr/sr) La Talina ei dapi diesch onns il local da sentupada per scolaras e scolars dil scalem superiur en Tujetsch. Avon surveva la Talina sco liug da sentupada per la giuventetgna. Igl onn 2009 ha Giuventetgna Cadi, lu aunc sut il num Siga, puspei aviert il local da sentupada per giuvenils Talina. Las localitads vegnevan numnadamein strusch duvradas pli dils iniziants e promoturs da quellas localitads, aschia che la Talina ha survegniu empau in auter intent e survevcha dapi lu a scolaras e scolars dil scalem superiur. Quei mintgamai ils venderdis sera dallas 18.00 tochen allas 21.30 e cun duas menadras ni dus menaders che survegileschan. La responsabladad per la planisaziun dallas seras surpren *Gabriela Cabalzar-Lombriser*, la menadra dil post dalla lavur aviarta da giuvenils ch'ei gia dapi l'entschatta da quei project dalla partida.

Giubileum e renovaziun

Tenor Cabalzar-Lombriser sa la Talina pia festivar uonn il giubileum da 10 onns e cun quella caschun seigien ei sedecidi da renovar la Talina. Sco ella di duei il local per giuvenils vegnir renovaus cun susteniment dalla vischnaunca che surprandi ina gronda part dils cuosts, cun atgnas forzas ed ei sperien era da vegnir susteni dalla populaziun dalla vischnaunca da Tujetsch. « El mument havein nus igl agid da differents babs che fan lavur dil fatg », di Cabalzar-Lombriser ed aschunta ch'ils menaders e las menadras che fetschien survegilonza ella Talina s'engaschien a moda exemplarica per quella renovaziun. Motivai da s'engaschar per la renovaziun ein tenor la menadra dil post dalla lavur aviarta da giuvenils era ils visitaders che segidan cun luvrar duront lur temps liber. Tuttina caschuni quei project considerabels cuosts ch'ei empovien da curclar cun differentas acziuns. Aschia per exempel culla fiera da plugs ch'ha liug venderdis, ils 22 da fevrer a partir dallas 19.00 ell'aula dalla casa da scola a Sedrun. Leu dat ei era la pusseivladad da guder la cumpignia en ina stiva da caffè e duront differentas producziuns.

Engrazieivels per agid

Dapi decennis eis ei vegniu fatg neginas investiziuns pli grondas ella Talina, aschia ch'ei dess enqual mobilia e preit che stuess vegnir scumiada ni modernisada. « Sco emprem havein nus gia entschiet a midar ora il plantschiu sura e sche tut va bein vegnan era las ulteriuras preits e mobílias a vegnir sanadas el decuors dils proxims onns », declara Cabalzar-Lombriser. Damai ch'ei mirien da saver far aschi bia lavurs sco pusseivel sezs selegrien ei secapescha da mintga mistergner che savessi segidar duront enzacontas uras. Leds seigien ei era da mintga sustegn finanziaal.

Tgi che sesenta plidentaus sa pagar ina donaziun sut: Fundaziun Tür auf – mo vinavon, Giuventetgna Cadi 7180 Mustér, CH91 8107 2000 0010 1773 4, quei cun la remarca: Renovaziun Talina. Tgi ch'ha plascher da segidar cun lavur pratica sa s'annunziar tier la menadra Gabriela Cabalzar-Lombriser (telefonin: 078 673 57 38)

